

**Kalaallit Nunaannut suliffissarsiortarneq pillugu Inatsisartut inatsisaata allanngortinneqarnera pillugu Inatsisartut inatsisaattut siunnersuummik saqqummiussinissamik Naalakkersuisut peqquneqarnissaannik Inatsisartut aalajangiiffisassaattut siunnersuut. Inatsisissatut siunnersuut nunatsinnut nuuttut kalaallit kulturiannik, oqaasiinik naleqartitaannillu ilinniarnissamut piunasaqaatitalimmik periarfissinneqarnissaannik aalajangersaassaaq. Inatsisissatut siunnersuut kingusinnerpaamik UKA2024-mi Inatsisartunut saqqummiunneqassaaq. Inatsisissamik piareersaasiarluni suliaqarnerup peqatigisaanik, Kalaallit Nunaanni inuiaqatigiinnut akuusitsilersitsinissamik inatsimmik atulersitsinissaq pillugu Naalagaaffeqatigiinni oqartussaasunut Naalakkersuisut saaffiginnissuteqassapput. (Inatsisartunut ilaasortaq Agathe Fontain, Inuit Ataqtigiit)**

### **Akissuteqaat**

(Isumaginninnermut, Suliffeqarnermut Nunamullu Namminermt Naalakkersuisoq)

### **Siullermeerneqarnera**

Aallaqqaasiutigalugu Naalakkersuisut sinnerlugit Inatsisartunut ilaasortaq, Agathe Fontain, Inuit Ataqtigiit, nuuttut kalaallit kulturiannik, oqaasiinik naleqartitaannillu ilinniarnissamut periarfissaannik ukkataqalernissaq pillugu qujassuteqarfiginiarpara.

Sinnersuuteqartup kissaatigaa nuuttut kalaallit kulturiannik, oqaasiinik naleqartitaannillu ilinniarnissamut pitsaaneruseqarnera periarfissaqarnissaat qulakkeerneqassasoq.

Tassunga atatillugu 2022-mi Kalaallit Nunaannut nuuttut katillugit 1.860-iusut Naatsorsueqqissaartarfimmi nalunaarsorneqarput.

Naalakkersuisut erseqqissarusuppaat, najugaqarallarlutik sulinermt akuersissuteqartut aamma atajuartumik najugaqarnissamut akuersissuteqartut assigiinngissuteqarmata.

Nunami allamiut Kalaallit Nunaanni najugaqarallarnissamut sulinissamullu ukioq ataaseq angullugu akuersissummik tunineqartarput. Kalaallit Nunaanniinnerminni pisortatigut ikiorsiissutinik tunineqarsinnaanngillat.

Nunami allamiutut suliarortut Kalaallit Nunaanni atajuartussamik najugaqarnissamut kissaateqartoqarpat, piunasaqaatit arlallit naammassineqartariaqarput. Naammassisassat ilaatigut makkuupput; kalaallisut danskitulluunnit paasinartumik oqalussinnaaneq aamma suliffimmi ataatsimi ukiuni quliusuni minnerpaamik ukiuni arfineq-marlunni sulisimanissaq aamma assersuutigalugu peqatigiiffilerineq aqutugalugu inuiaqatigiinnut ilanngutivinnissaq.

Pingaarnertut kontumi 40.92.18-mi kalaallit, danskit tuluillu oqaasiinik pikkorissaanissamut aningaasaliissutinik immikkoortitsisoqarpoq. Oqaatsinik pikkorissaanerit KTI-mit, Kalaallit Nunaanni Teknikimik Ilinniarfimmit, aqunneqarput. Pikkorissaanerit ilaannakortumik pisortanit aningaasaliiffigineqarput. Sermersooq.gl-imi kalaallit oqaasiinik internet aqutugalugu akeqanngitsumik pikkorissartoqarsinnaavoq. LearnGreenlandic aamma kalaallisut ilinniartitsineq internet aqutugalugu neqerooruteqarpoq. Pikkorissaanerit akeqanngillat.

Ukiut qulit kingulliit taamaallaat 164-it atajuartussamik akuersissuteqarput. 164-inik taakkunanga 98-it katissimapput. Tassa imaappoq amerlanerpaat najugaqarallarlutik maaniipput, aamma ukioq ataaseq angullugu najugaqarallarnissamut sulinissamullu taamaallaat akuersissuteqarlutik.

Nuuttut atajuartussamik najugaqarnissamut akuersissuteqartut amerlanersaat katinnertik tunngavigalugu najugaqarnissamut akuersissut pissarsiarisimagaat eqqarsaatigalugu inuiaqatigiinni ilanngutivittut naatsorsuutigisariaqarput.

Kalaallit Nunaannut ilanngutivinnissamut inatsit pillugu Naalakkersuisut upernaq manna danskit oqartussaasui Kalaallit Nunaanni ilanngutivinnissamut inatsimmik suliaqarnissaq pillugu aamma qimaasut nunasisullu ilanngullugit attaveqarfigeqqippaat.

Tamanna tunngavigalugu Naalakkersuisut allannguutissatut siunnersuummik saqqummiiniarput:” **Kalaallit Nunaannut suliffissarsiortarneq pillugu Inatsisartut inatsisaata allanngortinneqarnera pillugu Inatsisartut inatsisaattut siunnersuummik saqqummiussinissamik Naalakkersuisut peqquneqarnissaannik Inatsisartut aalajangiiffisassaattut siunnersuut. Inatsisissatut siunnersuut nunatsinnut nuuttut kalaallit kulturiannik, oqaasiinik naleqartitaannillu ilinniarnissamut piunasaqaatitalimmik periarfissinneqarnissaannik aalajangersaassaaq. Inatsisissatut siunnersuut kingusinnerpaamik UKA2024-mi Inatsisartunut saqqummiunneqassaaq.”**